



Sabtu, 05 Maret 2022

Ogen: Esekiel 30:20-26



Kupenggelken Tanna



“Kupenggelken tanna” enda me sibelasken Tuhan si erdaulat nandangi raja Mesir. Raja e me pemimpin si merentah kerna rakyat, mereken ngaruh si mbelin kal nandangi kegeluhen rakyat sabap ia me si erbahan keputusan-keputusan kerna kegeluhen si ipinpinna. Kerina rakyatna arus mehamat dengen nembah man raja e. Biak sibagenda peturah kiniganjangen rukur. Tuhan ernubuat arah nabina kerna raja enda maka tan e ipenggelken janah la lit ise pe mbalutisa, la lit ise pe si ngerempuisa tanna si penggel e gelah malem. La terjeng sebelah tan e ipenggelken tapi duana tan si kawes ras kemuhen Dibata menggel kenca. Tujunna e me gelah ndabuh pedang e bas tanna nari ndingen lanai banci erperang. Adi tan raja enggo penggel, rakyat pe lanai erpemimpin e maka kerina rakyat Mesir pe merap ku belang-belang doni. Tuhan pe make raja Babilon segelah erbahan kerajaan Mesir enda kote, e maka arah kai siibahan Dibata e jadina kerina kalak metehsa maka Tuhan e si mada kuasa.

Kai banci sialoken arah nubuatan Esekiel bas ogenta wari enda? Tan usur ipake raja Mesir guna erperang, gambaren kekuasaan dengen kiniganjangen ukur. Piaha nundalken kerna kuasa Dibata, e maka ipenggelken Dibata, la lit simbalutisa. Enda me bentuk ukumen Dibata. Ibahan Dibata raja lanai erdaulat. Talu bas peperangen e. Kerina sinianggap banci pehagaken diri bangsa enda i kerapken me. Tujunna segelah kerina kalak metehsa maka Dibata Israel e me Tuhan, Si Mada Kuasa seh rasa lalap. Selaku nande tengah jabu, tetap min ngeluh bas kiniteruken ukur, ersukuten man Dibata. Banci jadi kita sangana ngalaken perbeben si mberat, adi siukuri pe talu nari nge kita bas perbeben e. tetaplah inget maka Dibata banci erbahan perbeben/musuhta e jadi penggel dengen bagi Dibata make raja Babilon bage pe bas kegeluhen maka ise pe banci ipake Dibata guna keselamatan, kiniulin dengen kedamen bas kegeluhenta.